

BESTELAKO XEDAPENAK

JUSTIZIA ETA GIZA ESKUBIDEEN SAILA

3201

103/2026 DEKRETUA, ekainaren 23koa, Vitoria-Gasteizko Bulego Judizialari, Arabako Probintzia Auzitegiari eta barruti judizial horretako Bake Epaitegiei dagozkien Justizia Administrazioaren zerbitzuko langileen lanpostu-zerrendak onartzeko dekretuak indargabetzekoa.

Justiziaren Zerbitzu Publikoaren Efizientziaren Arloko Neurrien urtarilaren 2ko 1/2025 Lege Organikoak aldatu egiten du I. tituluan Botere Judizialaren uztailaren 1eko 6/1985 Lege Organikoa, Justizia Administrazioaren antolamendua berritzeko.

Lege organikoak dakartzan aldaketak hainbat esparrutan zertzen dira. Aldaketa horietako batek, alde batetik, lehen auzialdi judizialaren konfigurazioan du eragina, pertsona bakarreko epaitegi izatetik kide anitzeko antolakunde izatera igarotzen baita, auzialdiko auzitegiak sortuta; bestetik, eragina du, halaber, bake-epaitegietan, udalerriko justizia-bulego bihurtzen baitira, eta bake-epaitegietako idazkaritzen elkarteei ere eragiten die, udalerrietako justizia-bulegoen elkarte bihurtzen baitira.

Bestalde, apirilaren 28ko 6/2021 Lege Organikoa –Erregistro Zibilaren uztailaren 21eko 20/2011 Legea aldatzen duen apirilaren 28ko 6/2021 Legearen osagarria, zeinaren bidez aldatzen baita Botere Judizialaren uztailaren 1eko 6/1985 Lege Organikoa– aldaketa-eragilea izan da hauxe ezarritako: «Erregistro Zibilaren Bulegoa unitate bat da, bulego judizialean integratuta ez badago ere, Justizia Administrazioaren antolaketaren eremuan eratzen dena, aipatutako zerbitzu publikoa eramateaz arduratzeko, Erregistro Zibilaren Legean eta Erregistro Zibilaren Erregelamenduan ezarritakoaren arabera; zeregin hori betetzeko, Justizia Ministerioari lotzen zaio funtzionalki, Segurtasun Juridikoaren eta Fede Publikoaren Zuzendaritza Nagusiaren bidez».

1/2025 Lege Organikoaren lehen xedapen iragankorrak ezartzen du auzialdiko auzitegiak modu mailakatuan eratuko direla.

Era berean, 1/2025 Lege Organikoaren seigarren xedapen iragankorrak ezartzen du auzialdiko auzitegi bakoitzerako aurreikusitako eratze-datan bihurtuko direla bake-epaitegiak justizia-bulego udalerrietan, eta bake-epaitegietako idazkaritzen elkarteak justizia-bulegoen elkarte udalerrietan.

Euskal Autonomia Erkidegoaren esparruan, bi aurreikuspen horiek zuzenean eragiten diete, besteak beste, Vitoria-Gasteizko barruti judizialetako bulego judizialari, eta barruti judizial horretako bake-epaitegiei eta bake-epaitegietako idazkaritzen elkarteei.

6/1985 Lege Organikoaren 436. artikulua, idazkera berrian, ezartzen du bulego judizialaren jardura –prozesu-legeak aplikatuz zehazten dena– zerbitzu komun bidez egingo dela. Zerbitzu horien barnean izapidetze-zerbitzu komunak sartuko dira, eta, hala badagokio, xedatzen diren beste zerbitzu komun batzuk. Zerbitzu horietan sartuko dira beren zereginak direla-eta funtzionalki lotutako lanpostuak. Eta, gainera, xedatzen du bulego judizialak diseinu malgua izango duela. Bakoitzaren neurria eta antolamendua, haren jardueraren arabera erabakiko du horretarako esku-mena duen administrazio publikoak.

Era berean, 1/2025 Lege Organikoaren bosgarren xedapen iragankorrak agintzen du ezen bulego judiziala eta auzialdiko auzitegiak aldi berean ezarriko direla, legean bertan xedatutako baldintzen arabera, eta, helburu hori betetzeko, justiziaren arloan eskumenak dituzten auto-

nomia-erkidegoek bulego horietako bakoitzeko lanpostu-zerrendak egin beharko dituztela, eta, sindikatuekin negoziatu ondoren, onartu. Ondoren, lanpostu horiek bete beharko dituzte.

Lanpostu-zerrendak Justizia Administrazioaren barne-egiturak antolatzeko tresna gisa erabiltzen dira, eta, 1/2025 Lege Organikoak egindako aldaketan ondoren, zerrenda horiek berriro egin eta onartu behar ditu arlo horretan eskumenak dituen administrazioak. Kudeaketa, Izapidetze eta Laguntza Judizialeko kidegoetako funtzionarioen antolamendua egiteko, lanpostu-zerrendak baliatuko dira; zerrendok onartu eta, betiere, publiko egingo dira, 6/1985 Lege Organikoaren 521. artikuluan xedatzen den bezala.

Lanpostu-zerrenda berriak onartzeko tresna juridikoari dagokionez, 6/1985 Lege Organikoaren 522. artikulua, berrikuntza gisa, eskatzen du bere jarduketa-eremuko lanpostu-zerrenden onarpena gauzatu dadila horretarako eskumena duen zuzendaritza-zentroko titularrak –Justizia eta Giza Eskubideetako sailburua– emandako ebazpenaren bidez.

Horren guztiaren ondorioz, eta aipatutako lege-aldaketak gauzatzeko, haxe da dekretu honen xedea:

– Partzialki indargabetzea 179/2011 Dekretua, uztailaren 26koa, zeinaren bidez onartzen baitira Euskal Autonomia Erkidegoko Justizia Administrazioako Bake Epaitegietako lanpostu-zerrendak. Kasu horretan, indargabetzeak Vitoria-Gasteizko barruti judizialari buruz jasotako aurreikuspenei soilik eragingo dio.

Zehaztu behar da dekretua partzialki indargabetzen ari dela, eta barruti judizialeko lanpostu-zerrendei modu mailakatuan eragiten dietela, bulego judizialaren eredu berria pixkanaka ezartzen ari den heinean.

– Indargabetzea 224/2012 Dekretua, urriaren 23koa, Vitoria-Gasteizko barruti judizialari dagozkion Euskal Autonomia Erkidegoko Justizia Administrazioako lanpostu-zerrendak onartzeko dena.

Ondorioz, Justizia eta Giza Eskubideetako sailburuaren proposamenez, eta Jaurlaritzaren Kontseiluak 2026ko ekainaren 23an egindako bilkuran aztertu eta onartu ondoren, haxe

XEDATZEN DUT:

Lehenengo artikulua.– Partzialki indargabetzea uztailaren 26ko 179/2011 Dekretua, Euskal Autonomia Erkidegoko Justizia Administrazioako bake-epaitegietako lanpostu-zerrendak onartzen dituen, Vitoria-Gasteizko barruti judizialeko bake-epaitegiei eta bake-epaitegietako idazkaritzen elkarteei buruz jasotako xedapenei dagokienez.

Horrela, erabat indarrean egongo dira Vitoria-Gasteizko barruti judizialari buruzko xedapenak, Justizia eta Giza Eskubideen sailburuaren 2025eko uztailaren 2ko Aginduan jasotakoak, zeinaren bidez onartzen baita udalerrietako justizia-bulegoetan eta justizia-bulegoen elkarrekin Euskal Autonomia Erkidegoan Justizia Administrazioaren zerbitzura diharduten langileen lanpostuen zerrenda.

Dena den, dekretuak indarrean jarraituko du Barakaldo eta Bilbori buruzko xedapenei dagokionez, harik eta barruti judizial horietan bulego judiziala ezarri arte.

Bigarren artikulua.– Indargabetzea 224/2012 Dekretua, urriaren 23koa, Vitoria-Gasteizko barruti judizialari dagozkion Euskal Autonomia Erkidegoko Justizia Administrazioako lanpostu-zerrendak onartzeko dena.

AZKEN XEDAPENETAKO LEHENENGOA

Dekretu honek kasuan kasuko lanpostu-zerrenda berriak indarrean jartzen direnean izango ditu ondorioak.

AZKEN XEDAPENETAKO BIGARRENA

Dekretu honek administrazio-bidea amaitzen du, eta haren aurka aukerako berraztertze-errekurtsoa aurkez dakioko Gobernu Kontseiluari, dekretua argitaratu eta hurrengo egunetik hilabete igaro baino lehen. Bestela, administrazioarekiko auzi-errekurtsoa aurkez daiteke, Euskal Autonomia Erkidegoko Justizia Auzitegi Nagusiko Administrazioarekiko Auzien Salan, dekretua argitaratu eta hurrengo egunetik bi hilabete igaro baino lehen.

Vitoria-Gasteizen, 2026ko ekainaren 23an.

Lehendakaria,
IMANOL PRADALES GIL.

Justizia eta Giza Eskubideen sailburua,
MARÍA JESÚS CARMEN SAN JOSÉ LÓPEZ.

EKAINAREN 23KO 103/2026 DEKRETUAREN ERANSKINA

INDARGABETZEAREN ERAGINPEAN DIREN BAKE-EPAITEGIEN ETA
BAKE-EPAITEGIETAKO IDAZKARITZEN ELKARTEEN ZERRENDAA

Arabako Lurralde Historikoa	
Vitoria-Gasteizko barruti judiziala	Iruña Okako Bake Epaitegia
	Aguraingo Bake Epaitegia (Idazkaritzen Elkarte)
	Laguardiako Bake Epaitegia (Idazkaritzen Elkarte)
	Zigoitiako Bake Epaitegia (Idazkaritzen Elkarte)